

方簡肅集
貞

蘇平知學

PDG

方簡肅公文集卷之九

書啓

寄正郎黃易菴年九

生不才且迂愚僉臬事自才而通者視之官
滯於遷轉地僻於炎荒弗屑也而生固安之
非獨謂分攸宜亦謀諸心所願也所恨地位
隔越不得親炙故人於天上而寮友之間卒
然相遇又未見所謂傾蓋者徒以平日勦竊
之學膚淺之見自虞自繹彊勉敷施祗恐

或憊而償焉重爲知己者愧也自辛酉四月
上官卽分道海南七月值黎寇符南蛇倡亂
生遂奉

勅印以行浮溟渤抵絕島寄死生於風波烟瘴
之中此時視官職真泥沙也比至而賊勢已
熾不可撲滅有激而致之者有縱臾以成之
者生蓋未暇致詰疲精神竭心力以從事於
撫捕九月幸有臨高之捷時領軍者都司湛
鉞也某自謂繼是當如破竹孰意天不助順

乃有感恩之火抱吉之敗遂使猖獗至今上
厯

當寧之憂生之不才不必他驗矣夫以數萬強
寇不能困儋城而感恩以數十寇乃火人民
城郭有無衆寡之別也以不滿二千兵破賊
於臨高而後朝食而抱吉以五千之衆反爲
敵所困或者歸咎於將之寡謀若都司何清
似矣而劉朋節胡永年皆以經略自負謀豈
弗臧而成敗莫能豫料此則某所不敢知要

亦有數存乎其間也某緣此及瓜不代賤累
產病死而復生者屢弱子呱呱寄乳哺於他
人官俸停支市米而食客中衣履且敝從者
咨怨形於旦夕某皆不暇恤而獨以不病以
死自幸復以困窮拂鬱天或玉成乎我自解
而其實亦彊焉耳非自然也滅賊之事東山
老先生已有成算今復以潘老先生繼之老
成謀事必無遺策捷音之報伊邇矣某荷愛
最深而箚牘之禮久缺不脩者亦坐此事今

因風便顓此申懇而詳於黎情者恐欲聞也
感激之念傾企之私則惟照亮之

奉督府劉東山公

某屢奉指麾皆已施行賊亦漸解散近聞大
軍來乃復出圍昌化及徑出臨高迎敵雖其
冥頑不悟亦騎虎難下之勢也大軍初十日
出城未料卽有此敵行至西峯驛得報乃從
間道進適與敵相遇幸藉威福得此大捷今
議乘勝直前以解昌化之圍恐兵寡不足以

成大功。有孤委托。若再奏一捷。兵雖不益。可也。管叅議不至。錢糧未見。作何處置。而犒賞之不行。又不足以鼓舞士氣。某姑隨時斟酌。終以非大征進。未奉

明文。未敢輕費。伏乞促令渡海。相與共圖之。幸。幸。發下教帖。繳納不備。

奉司馬劉東山公

某性迂拙。不善爲世俗機變。悞媚之態。以故見知於當道。絕少。然大賢君子。誤以其直朴。

也每憐之七坊之變某間關海內餘二年冒
矢石觸炎瘴瀕於死者屢矣中間喪妻子皆
不遑恤自謂忠於

王事人且知之而巡按不知督府不知知之者
獨老先生某亦奚啻干譽於左右哉天地無
棄物迂且拙者固大賢君子之所不棄也知
感何限乙丑丁先大人喪戊辰服闋北上又
以不附權奸廢斥家食者三年迂拙之故也
時先生戍肅音耗不通某不能爲散宜生出

姜里之舉西向長號有痛憤耳不謂公道復明以有今日被害我者安在哉善惡之報信不誣也生亦蒙再起誤有今

命上官後誼當走訊起居且申謝悃而官府縻之末由借便偶陳憲副行謹薰沐附致區區嗣有公出卽躬拜庭下以旣所欲言

奉師相費湖東公

戊辰待罪德清曾寄謝柬比到家貧病交攻又乏風便坐是起居尺牘不復裁附此境此

心知蒙聖亮也是歲九月得邸報知奸宦伏
誅公道復明士氣復振雖愚夫愚婦亦額手
驩慶謂不圖今日復見太平之治顧不肖如
生亦辱再起誠貽薦剡之羞然真才未必盡
用鬬茸奸佞之徒未必盡去此老先生位台
鼎者所憂也邪正之不可同朝猶薰蕕之不
可同器也權相軋而勢相傾十君子不能勝
一小人一二年後公道士氣必將晦蝕而萎
繭矣故欲成至治非盡用真才不可老先生

其不思及此乎其不與諸老先生虞及此乎
晚進小臣謬爲闊論恃老先生素愛且有容
也瑣瑣寒溫不敢瀆聽

又

制中久不奉狀謝過末由舍姪重熙書來屢
道老先生拳拳記憶益增愧赧先妣祭塋之
典出自望外者固

朝廷曠蕩之恩實老先生維持張主之力此莆
百五十年所無盛事明冥之感有窮已時耶

顧犬馬之齒日衰異日無以爲報愧且感耳
鄭汝華回略聞時事山林之人不知休咎所
知者解紆調劑以身負天下之重有老先生
在耳某辭月米疏吏部不爲覆題不解其意
今再疏決辭仰候

俞旨然非老先生孰能致之過望過望莆事杰
兒耿姪扣之能答瞻對無緣臨楮無任馳戀
又

傳聞大懟已殲惟一二人漏網想今亦盡殲

矣卽盡殲彌天之罪亦不足以消我終天之
痛事不能盡如吾意法不能盡人之情徃徃
如是亦付之無可奈何耳今不審眷屬得返
故居否竊意郡城治第爲終老計亦菟裘也
尊意必有定主恨不得面論近日事變異常
伍光祿事尤異光祿去後又屯於鎮守府門
外挾取銀二萬兩越二日計擒渠魁五十餘
人漏網者尚二十餘人脅從乃散前此延邵
軍人亦亂議者謂地震之應莆地亦屢震去

歲四月大震聲殷殷如雷從西北來西去莆
之變尚可慮也族孫麟趾爲舍姪重熙來乞
舍弟墓銘脩此申臆舍姪敢犯冒瀆之咎已
自齋沐具啓言其故矣某不敢贅告特在愛
中必不峻拒秋涼萬惟寶嗇民心所係非小
小也不備

與方伯席原山公

忽得惡報果如人言而彼撫按三司無一人
豫發之者勢之劫人可畏也已以此賊爲此

舉天意人心有怒與怨耳其能久生乎然疆土所係未可以無事處之繕甲兵募勇敢清軍士完雉堞積芻糧守要害防奸細勤偵伺脩間諜凡爲保全之計者不可不圖也萬一天未厭禍延其時月則徵召之兵亦當豫辦所最切務者錢穀也一應起解俱暫停留寧受不供之責無使軍興告乏諸司百費俱宜節省卽鹿鳴大宴亦宜稍損於昔不必苦留諸生兩費無益近日餘功恐有餘怨宜大布

誥言以安其心無使疑慮分水仙霞諸口與
凡鄉村居民有貨貨積穀宜徙入城或屯大
鎮以兵守之此清野之法宜豫告之待敵將
至徙且屯良益孰勇孰怯孰智孰愚孰可爲
大將孰可爲裨將今當豫知毋臨事付之匪
人而重賞有勇夫威克乃允濟此用兵大要
非吝與畏者可能辦故曰不可付之匪人杞
人之憂若迂以遠然愚者言之智者聽之敢
謂有一得之助乎

又

敵愾之氣方鬱勃凱旋之歌已洋溢事亦奇
矣然可恃以爲安耶益修吾備以無弛今日
事也遺大投艱當不能舍執事而他林下之
人私憂過計不過太平是望豈故爲逸口以
胥恐動哉不罪不罪昨得報知賊謀如李士
實劉養正皆出所不料口談仁義而動有桀
殘者可信哉當今世有此人宜無足怪而知
人則哲萬古所難不歲寒不板蕩安享美名